

AKASHVANI AIZAWL
REGIONAL NEWS BULLETIN
HEADLINES (MORNING)

- 1. Dampa Assembly bial By-Election vote thlak chu boruak muanawm tak hnuaiah nimin khan zawhfel a ni a, hriat theih chinah vote tla zat za zela 83.07 a tling a ni.
- 2. Aizawla Maumual chinfel ngai te chinfel niin, ram pass lem a awm thei tawh lo turah an ngai tih Revenue Minister Pu B Lalchhanzovan a sawi.
- 3. Bihar Assembly inthlan thawhnhnihna nimina neih zawh takah vote zaa 69 a tla.
- 4. President Draupadi Murmu leh Bostwana President Duma Bokote vawiinah Gaborone ah an inkawm dawn

<><><>

AMPA BY POLL

Dampa Assembly bial By-Election vote thlak chu boruak muanawm tak hnuaiah nimin khan zawhfel a ni a, hriat theih chinah vote tla zat za zela 83.07 a tling a ni.

Dampa bial by election Returning Officer Pu Malsawmzuala hnen atanga thudawn danin Dampa bial chhung polling station 41 ah te tluang takin mipui ten vote an thlak a, ruahman lawk angin polling station 39 ah te chuan tlai dar li khan mipui ten vote an thlak fel thei a, Silsuri 1 leh Marpara North polling station ah te tlai dar 4 hnuah vote thlak zui a ni a, Marpara North hi dar 8:20 vel ah vote an thlak zo thei ni a thudawn a ni.

Byte

Akashvani News Aizawl chuan nimin khan Dampa Bial MLA inthlana vote thlakna hmun hrang hrang a tlawhkual a, harsatna leh buaina liantham awm loin tluang takin vote an thlak a; tun by election ah hian a tum khat nana vote thlak te pawh engemawzat an hmu a ni.

Kan corr sawi danin tun Dampa by election hi political party tin tan a pawimawh hle a, by election result hian political party tin tan kum 2028 MLA Inthlanpuia an dinhmun tur ah nghawng lian tak a nei dawn ni a ngaih a ni.

Vc & First time voter byte

Puan tawh angin Dampa bial By- Election kalpui mekah hian Polling Station 41 awmin Polling station 40-ah hian webcasting kalpui niin Zopui Polling station-ah erawh kawlphehtha a luh loh avangin kalpui ve theih a nilo a ni. Dampa Constituency chhungah hian Critical Polling station Silsury I,II, III te an ni a. Dampa-ah hian vote awm zawng zawng zat hi 20888 a ni.

<><><>

LAWNGTLAI TYPHOID

Lawngtlai District chhung, Kakichhuah ah Tuihri ni a hriat vangin mi pali an thih tawh a, Medical Team ten nimin khan Kakichhuah an pan.

Kakichhuah hi Lawngtlai atanga chhim lam, Myanmar ramri a awm niin, Tuithumhnar MDC bialchhung a awm a ni a, Tuithumhnar bialtu MDC Pu H.Lalmuansanga chuan Kakichhuah hrileng leh chhiatna thleng hi tukin khan Lawngtlai Bawrhsap, Pu Donny Lalruatsanga hrilhin, Bawrhsap hian rangtakin Chief Medical Officer, Dr.Lalmuanawma Jongte nen ruahmanna hmanhmawh siamin vawiin khan Medical Team, Dr.C.Lalzampuii hovin, thuamfamkim nen tirh nghal an ni.

Kakichhuah a Hrileng vang hian mi pali an thi tawh a, November 4 khan Pu Lawmla kum 75 chu hrileng vang hian a thi a, November 9 khan Pi Neda kum 24 leh Pu Kailaw kum 48 te an thi ve leh a, tukin khan Tv Sawla kum 28 chu a thi ve leh a, hri vanga thite hi Khumi hnam ni a hriat an ni.

Kakichhuah khawtlang hruiatute chuan Hri a darh lohnan Mitthi sawngbawl leh vuina pawh mipui nawlpui a punkhawm an remti lova, mitlawmngai thlanchhuah ten an buaipui.

Lawngtlai CMO Dr.Lalmuanawma Jongte chuan Kakichhuah a hrileng chu enfiaha, damlo te enkawl turin Medical Team an kalthu Lawngtlai a Akashvani corr hrilhin, mipui te chiaai lo tura chahin, Ei leh in ah fimkhur tur leh Tui chhuanso dah daih leh chauh inturte, zun leh ek thlahdah lo turin a chah a, tun dinhmun ah damlo 15 atanga 20 vel an awm mek niin a hriat a, he natna veite chuan rangtaka Damdawi lam thiamte rawn zung zung turin a chah baw.

<><><>

MAUMUAL REVENUE PASS

Revenue Minister Pu B.Lalchhanzova hmalakna in Maumual, Aizawl ram chinfel a ni a, ram 3,61,188 zet teh fel tawh niin, ram pass lem a awm thei tawh lo turah an ngai tih Minister chuan a sawi.

Nimin khan Revenue Minister Pu B.Lalchhanzova hovin Maumual, Aizawl-ah Distribution of Land Passes at Maumual House Site Plan neih a ni a, document felfai nei mi 456 te hnenah Land Pass a semchhuah nghal a ni.

He hunah hian Revenue Minister Pu B.Lalchhanzova chuan, Land Revenue and Settlement Department changtu Minister a nih hnuah Maumual ram leh hmun dang tam tak ram chinfel ngaiin a hmuak nghal a ti a, tuna Maumual ram chinfel a nih theihna turin Sorkar kal tawhte'n an phak tawh leh tih theih angin hma an lo la tawh tih sawiin, tuna Revenue department-in hma a laknaah ram 3,61,188 zet teh fel tawh a ni a, ram pass lem a awm thei tawh lo turah an ngai a ti a. Tunah Maumual bik an chingfel thei ta chu lawmawm a tih thu sawiin, mi tam takin he ramah hian in an sa chho tawh dawn a, ram buai awm tawh lova, inngeih taka awm tlang turin ram neitute a ngen nghal a, Maumual 2nd Phase pawh an chingfel leh thuai turah a ngai a ti a, ram inchuhna leh chumi avanga buaina a tam hle tih sawiin,duhamna avanga tawh chin nei lo nih tum ve lo turin kalkhawm te a chah a ni.

He hunah hian PAMRA President Pu Vanlalbiaa pawhin thusawiin, remna avanga lo haw MNF hnam sipaite tana pek Maumualah chuan sorkarin LSC-te pe mah se mahni ram awmna hre lo an tam hle a, ram buai a tam bawh nen chinfel sak turin sorkar vawi tam tak ngen tawh mahse tihfel sak an ni ngai lo a ti a, tuna kalphung thar mipui sorkar, ZPM-in kum hnih chhung leka an chinfel sak thei chu a ropui an tih thu a sawi a, Peace Accord MNF Returnee Association member-te hmangaihtu Chief Minister Pu Lalduhoma, leh Revenue Minister Pu B.Lalchhanzovate chungah thinlung takin lawmthu a sawi a ni.

Chaltlang ram Maumual-ah hian house pass 829 bawh vel atangin Govt. Land Bank leh Land Lease engemawzat a awm a, mimal ram 740 bawh vel awmin ram buai a tam em avangin ram nei tan pawh kutthlak hleih theih a ni lova, Revenue Minister Pu B.Lalchhanzova hmalaknain re-survey neih a ni a, Department lamin theih tawpa hma an lak zui hnuah chinfel a ni ta a.

Land Revenue & Settlement Department chuan a hmunah khawh nen thutchilhin LSC awlsam chi leh rintlak zawk tur Record of Rights (RoR) an semchhuak a ni.



FARMERS MEET

Nimin KVK Khawzawl leh Dhanuka Agritech tang kawp buatsaihin nimin khan Neihdawn khuaa Community Hall-ah Mega Farmers Meet neih a ni.

He hun hi Senior Scientist & Head Dr. Malsawmkimi, Senior Scientist & Head, KVK Khawzawl in a kaihhruai a. Pu Mrinmoy Baruah, Deputy General Manager (Sale) Dhanuka Agritech Limited, South Kolkata leh Pu Dipak Debnath, Senior Sales Officer, Dhanuka Agritech Limited, Guwahati ten an rawn hmanpui a ni.

He hunah hian Dhanuka Agritech lamin kuthnathawktute hriat atana pawimawhte hrilhin presentation an pe a. KVK atangin Dr. Lalngaihawmi, SMS (Plant Protection) chuan Safety use of Pesticides tih thupui hmangin kuthnathawktu lo kal khawmte hnenah zirtirna a pe a. Thlai leh huan lo ram kan enkawl na kawngah kan lo him a, kan fimkhur zel theih nan hlo leh damdawi hman dan chungchangah KVK mithiam englaipawha rawn theih an nih thu a sawi a. Kuthnathawktute nen a inkawmhona hun hman a ni bawh.

He hun hmang hian Neihdawn khuaa kuthnathawktu 80 an kal khawm a ni.

(Lalsangpuii Khawzawl PTC)

<><><>

END KHAWZAWL

Khawzawl Excise & Narcotics Department chuan kuminah thubuai 159 ziaklut tawhin heng thubuai kaihhnawihah hian mi 129 an man.

END, Khawzawlah hian kumin January ni 1 atanga thla hlui October ni 31 thleng khan ND&PS Act hnuaiah thubuai 7 ziaklutin heng thubuai kaihhnawiah hian mi 8 an man a, hemi hun chhung vek hian MLP Act 152 ziahluh niin mi 121 man an ni bawk.

END Khawzawl Department hian kumin January atanga October thla chhung khan zu leh ruihtheih thil chi hrang hrang bakah Zu siamna hmanrua engemawzat an man a. An man zingah hian Heroin 540 grams, Ganja 3.55 grams, Rakzu 217.7 litres, BEDC 134.75 litres, Beer 124 cans, Sapzu um 4 leh yeast 300 grams te a tel a ni.

(Lalsangpuii Khawzawl PTC)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

BIHAR ELECTION

Bihar Assembly inthlan thawhnhnihna chu tluang takin nimin khan zawh fel a ni a. Inthlan thawhnhnihnaah hian vote zaa 69 vel a tla a ni. Inthlan thawhnhnihnaah hian district 20 huamchhunga Assembly bial 122 ah vote thlak a ni a. Voter vaibelchhe 3 leh nuai 70 chuang an awm a. Candidate hi an vaiin 1302 awmin an zingah hian hmeichhia 136 an tel a ni. Nimin zing dar 7 atang khan vote thlak tan a ni a, tlai dar 6 thleng vote thlakna hun hawn a ni a. Assembly bial 7 bikah chuan tlai dar 5 ah vote thlak hun khar a ni. Polling station 595 chu hmeichhiate vil tur bika ruahman a ni a. Polling booth 21 chu pianphunga rualbanlote enkawl tura dah a ni bawk a. Model Polling station hi 316 siam a ni. Tun tum inthlanah hian candidate langsar zingah Chief Minister Nitish Kumar te, JD(U) hruaitu hlun leh State Power Minister nilai Bijendra Prasad Yadav te an tel a.

Bihar Assembly inthlan vote tla te hi tun thla ni 14 ah chhiar a ni ang.

(Newsonair)

<><><>

PRESIDENT

President Draupadi Murmu leh Bostwana President Duma Bokote vawiinah Gaborone ah an inkawm dawn a. Ram pahnih inlaichinnate zau takin an sawi dun rin a ni a. Sumdawnna leh sum peipunna lamte, technology, energy, agriculture, health, pharmaceutical, defence leh mipuite inpawhna tura hmalakna te an sawidun ang.

President Murmu-i hian nizan khan Bostwana khawpui hi a thleng a. Hlawhtling takin Angola a lo tlawh tawh bawk a ni.

(Newsonair)

